



Perkembangan Tamadun Islam di Andalusia: Analisis Kemakmuran Ekonomi Era Pemerintahan Kerajaan Umawiyah

NORANIZAH YUSUF, NORSINAH TOMPENG & EZAD AZRAAI JAMSARI

Abstrak

Andalusia pernah menjadi saksi kegemilangan sinar tamadun Islam di bumi Eropah. Kehebatan masyarakat Islam untuk memunculkan sebuah tamadun Islam yang gemilang di bumi Eropah walaupun kedudukannya yang agak terasing daripada wilayah Islam yang lain menjadikan sejarah tamadun Islam di Andalusia sebagai sesuatu yang bersifat unik. Di samping itu, ramai generasi pada masa kini tidak mengetahui tentang kewujudan sejarah tamadun Islam di Andalusia. Oleh yang demikian, kajian ini merupakan salah satu usaha penulis untuk mengetengahkan sejarah tamadun Islam khususnya dalam aspek pencapaian ekonomi di Andalusia. Kajian ini menggunakan pendekatan kajian historiografi iaitu kajian terhadap sesuatu yang berlaku pada masa lampau. Bagi mengukuhkan setiap fakta yang diperolehi penulis turut membuat kritikan dalaman dan luaran (*internal and external criticism*) terhadap sumber-sumber yang berkaitan. Kritikan luaran dilakukan untuk mengesahkan keaslian dan ketulen sumber dari segi masa, tempat dan individu yang menghasilkan sumber atau bahan tersebut. Kritikan dalaman pula dilakukan terhadap isi kandungan yang telah disahkan kesahihannya semasa melakukan kritikan luaran. Dengan kaedah ini, penulis mengenalpasti terlebih dahulu siapa yang mengeluarkan sumber berkenaan dan seterusnya kandungan sumber pula diuji untuk mengetahui kaitannya dengan fakta-fakta primer yang diketahui. Tujuannya ialah untuk mendapatkan ketepatan maklumat yang terkandung dalam sumber-sumber berkenaan. Hasil kajian mendapati, Andalusia telah mencapai tahap kemajuan yang tinggi dalam sektor perekonomian. Para pemerintah Kerajaan Umawiyah telah berjaya menyusun semula struktur ekonomi di Andalusia secara komprehensif.

Pengenalan

Aspek ekonomi merupakan salah satu aspek yang menyumbang kepada kestabilan dan keutuhan sesebuah negara, di samping aspek-aspek lain seperti politik, ketenteraan dan sosial masyarakat. Ibn Khaldun juga menyatakan hal yang sama. Menurut beliau, untuk menjamin kestabilan politik sesebuah negara dan meningkatkan kehidupan rakyatnya maka kegiatan ekonomi menjadi tumpuan utama Pemerintah (Karatas, 2006). Di samping itu, kegiatan ekonomi juga menjadi sumber pendapatan negara khususnya bagi menampung kos perbelanjaan pembangunan seperti mendirikan prasarana-prasarana pendidikan, membina masjid, bandar dan membiayai aktiviti ketenteraan dan pentadbiran negara. Oleh yang demikian, ekonomi merupakan agenda yang amat dititikberatkan oleh pemerintah (Labib, 1969). Ekonomi bukanlah persoalan baru dalam Islam, perancangan dan aktiviti ekonomi telah berlaku semenjak zaman Nabi Yusuf (a.s.) menjadi menteri ekonomi pertama di Mesir. Baginda telah meletakkan asas ilmu ekonomi dengan membuat satu perancangan rapi bagi memastikan negara mempunyai bekalan makanan yang mencukupi apabila menghadapi musim kemarau dan kekurangan bahan makanan. Nabi Muhammad (s.a.w) juga telah meletakkan ekonomi sebagai agenda pembangunan negara. Di Madinah, baginda telah menyediakan kemudahan pasar-pasar perniagaan untuk umat Islam menjalankan perniagaan. Tambahan, bumi Makkah sebagai tempat lahirnya agama Islam juga merupakan pusat perdagangan terkenal pada masa tersebut dan menjadi kawasan tumpuan para pedagang dari merata tempat (Labib, 1969).

Begitu juga halnya yang berlaku di Andalusia Para pemerintah Kerajaan Umawiyah telah menjadikan ekonomi sebagai teras pembangunan negara. Menurut sumber, sebelum kedatangan Islam ekonomi di Andalusia berada dalam keadaan yang malap (Imamuddin, 1963). Pemerintah Visigoth yang merampas kekuasaan di Andalusia daripada tangan Kerajaan Rom dikatakan gagal untuk menghasilkan satu sistem ekonomi yang lebih baik daripada keadaan sebelumnya. Mereka meneruskan sistem ekonomi perhambaan yang diamalkan oleh Kerajaan Rom. Di samping terpaksa menjadi hamba-hamba kepada golongan atasan, rakyat juga dikenakan dengan pelbagai jenis cukai yang membebankan (Azam, 1991). Keadaan ini telah melumpuhkan ekonomi Andalusia dan melahirkan rasa tidak puas hati rakyat terhadap pemerintah. Situasi ini mula berubah apabila Kerajaan Umawiyah secara rasminya mengambil alih pemerintahan di Andalusia. Pemerintah Umawi telah membantu mengubah cara hidup masyarakat di Andalusia sama ada dalam aspek sosial, politik mahupun ekonomi. Masyarakat di Andalusia telah menjadi masyarakat urban yang maju dalam pelbagai aspek kehidupan. Dalam bidang ekonomi, masyarakat di Andalusia telah mencapai kejayaan yang mengagumkan terutama dalam aspek pertanian dan perdagangan. Ekonomi Andalusia berkembang pesat sejajar dengan perkembangan ilmu pengetahuan dan kadar pertumbuhan penduduk yang meningkat saban hari. Hal ini berkait rapat dengan produktivi dan *consumerism* (kepenggunaan) di Andalusia. Kepenggunaan dan keperluan umum adalah suatu yang membuatkan adanya permintaan besar terhadap barang-barang dagangan di Andalusia (Ibn Khaldun, 2009). Peningkatan jumlah penduduk juga telah menyebabkan peningkatan jumlah permintaan terhadap barangan keperluan seharian di Andalusia. Peningkatan permintaan ini juga telah mendorong kepada peningkatan hasil produktiviti dalam negara sehingga berlakunya perkembangan yang pesat dalam sektor perdagangan di Andalusia.



Penyataan Masalah

Kerajaan Umawiyah dipilih sebagai subjek kajian disebabkan terdapat beberapa kenyataan yang menunjukkan kemakmuran sektor ekonomi di Andalusia. Jihoon Koo (2011) yang melakukan kajian terhadap perkembangan sektor perdagangan Kerajaan Umawiyah menyatakan:

The cities of Andalusia became commercial centres of Europe under Muslim rule, and Andalusian market served as a place for both domestic and foreign merchants. Andalusia people traded with other fluent regions under Islamic sphere of influence, and with the Iberian Christian kingdoms of the north. They also traded with Christian regions of the Mediterranean such as Italian city-states. The cities in the region of al-Andalusia were the commercial hubs of the Iberian Peninsula. Cities which later became trade centres were newly established and many existing cities were further developed and expanded.

Pernyataan ini memberi gambaran kepada kita bahawa sektor perekonomian di Andalusia telah berkembang dengan pesat pada zaman pemerintahan Kerajaan Umawiyah. Bandar-bandar telah dibangunkan menjadi pusat-pusat perdagangan di bawah pemerintahan Islam. Kegiatan perdagangan juga tidak hanya berlaku di dalam negara sahaja bahkan telah diperluaskan ke peringkat antarabangsa melalui kegiatan eksport dan import barangan Andalusia. Kepesatan perdagangan ini telah banyak menyumbang kepada penerokaan dan pembinaan bandar-bandar baru yang dijadikan pusat aktiviti perdagangan, Kegemilangan sektor ekonomi Andalusia turut digambarkan dalam kenyataan Imamuddin (1963) iaitu:

There was a mutual exchange of merchandise throughout the country. The cultivators and villagers sold in the towns what they produced as agricultural and cottage industry products and bought their industrial goods of daily use and luxury especially. Muslim, Jews, and Christian merchants were busy in internal and external imports and exports. They carried rare and valuable articles from place to place.

Perkara yang sama turut ditegaskan oleh Robert Raymond Gabriel yang menyatakan bahawa pada zaman pemerintahan ‘Abd al-Rahman al-Nasir, kemakmuran ekonomi Andalusia berada pada kemuncaknya. Pedagang-pedagang Andalusia berdagang hingga ke Constantinople dan Damsyik. Mereka juga mengembara hingga ke Mesir, Timur Tengah, Afrika Utara dan di sepanjang wilayah al-Maghrib (Gabriel, 2008). Pendapat ini dikuatkan lagi dengan pernyataan Constable (1994) yang menyatakan bahawa:

Andalusia markets were crucial western component in this system (trade and commerce), since not only did they consume and distribute eastern import but they also exported Iberian goods back to the eastern Mediterranean”.

Hal ini menunjukkan bahawa wujud hubungan dua hala antara Andalusia dengan negara-negara Timur Tengah walaupun dari semasa ke semasa berlaku perselisihan politik. Begitu juga, berlaku perkembangan pesat dalam sektor perdagangan di mana kegiatan perdagangan mereka disemarakkan lagi dengan aktiviti import dan eksport barangan dari dalam dan luar negara. Begitu juga pendapat yang telah dinyatakan oleh Sabri (2004):

Spain was the centre of trade and industry during the Middle Ages. Cordova, the capital of Spain was famous for its leather trade, silversmith and filigree works. Its industry could support two hundred thousand families.”

Kecemerlangan perdagangan di Andalusia dapat dilihat apabila Andalusia berjaya menjadi pusat perdagangan dan perindustrian yang penting pada abad pertengahan. Kenyataan sejarawan-sejarawan di atas secara keseluruhannya memberikan gambaran kepada penulis bahawa Andalusia pada masa pemerintahan Kerajaan Umawiyah telah mencapai kemakmuran dalam sektor perekonomian..

Metodologi Kajian

Kajian ini berbentuk kajian sejarah iaitu kajian terhadap sesuatu yang berlaku pada masa lampau. Oleh yang demikian, penulis telah menerapkan pendekatan gabung jalin metodologi struktural dan kontekstual yang terdapat dalam penyelidikan *historical* untuk mengukuhkan lagi kajian ini. Dalam penyelidikan ini, penulis mengadaptasikan metodologi struktural yang popular dalam penyelidikan sejarah dan analisis teks-teks sejarah bagi mengenal pasti dan menulis bahagian-bahagian atau sub-sub topik yang menjadi perbincangan kepada sejarah perdagangan Kerajaan Umawiyah di Andalusia.



Perbincangan mengenai sejarah perdagangan Andalusia ini diletakkan dalam konteks masa atau zamannya menerusi analisis kontekstual. Tujuan langkah ini adalah untuk menyaring dan membandingkan fakta yang terdapat dalam kajian-kajian kontemporari dengan fakta sebenar yang bernilai sejarah yang terdapat dalam sumber primer yang lain. Dengan pendekatan ini maklumat-maklumat berkaitan subjek kajian ini dapat disaring dan disahkan sebagai fakta yang betul-betul bernilai sejarah. Bagi mengukuhkan setiap fakta yang diperoleh daripada pelbagai sumber yang diguna pakai, penulis turut membuat kritikan dalaman dan luaran (*internal and external criticism*) terhadap sumber-sumber yang berkaitan. Kritikan luaran dilakukan untuk mengesahkan keaslian dan ketulenan sumber dari segi masa, tempat dan individu yang menghasilkan sumber atau bahan tersebut. Kritikan dalaman pula dilakukan terhadap isi kandungan yang telah disahkan kesahihannya semasa melakukan kritikan luaran. Dengan kaedah ini, penulis mengenalpasti terlebih dahulu siapa yang mengeluarkan sumber berkenaan dan seterusnya kandungan sumber pula diuji terlebih dahulu untuk mengetahui kaitannya dengan fakta-fakta primer yang diketahui. Tujuannya ialah untuk mendapatkan ketepatan maklumat yang terkandung dalam sumber-sumber berkenaan.

Objektif Kajian

Kajian ini bertujuan menganalisis fakta-fakta sejarah perkembangan dan pencapaian ekonomi di Andalusia pada zaman pemerintahan Kerajaan Umayyiah, bermula tahun 138-422H/756-1031M.

Hasil Kajian Dan Perbincangan

Menurut Imamuddin, Kerajaan Rom merupakan kerajaan pertama dan terakhir yang berjaya menyatukan wilayah kekuasaan di seluruh wilayah Mediterranean bermula dari Selat Gibraltar hingga ke pantai Syria. Pada zaman pemerintahan Greek, kegiatan perdagangan Greek hanya berpusat di sekitar Laut Aegean sahaja (Shahrulazmi, 2010). Bagi Kerajaan Rom pula, mereka telah menguasai keseluruhan jalan laut dan membina empayar perdagangan yang besar dan kuat di seluruh wilayah Mediterranean (Imamuddin, 1963). Oleh yang demikian, pemerintah-pemerintah Rom telah memajukan wilayah Andalusia dengan mendirikan kota-kota pelabuhan pesisir pantai Andalusia serta menyediakan kemudahan pengangkutan jalan raya (Ardzrooni, 1913). Langkah ini bertujuan untuk menarik perhatian para pedagang untuk datang ke Andalusia. Mereka juga telah mengusahakan bidang pertanian dan mengeksploitasi kekayaan sumber mineral Andalusia (Imamuddin, 1963). Kemakmuran ekonomi Andalusia di bawah pemerintahan Rom mula berubah apabila berlakunya peralihan sistem pemerintahan beraja kepada sistem pemerintahan republik. Kejatuhan sistem pemerintahan beraja ini telah menyebabkan kemunduran dalam bidang ekonomi Andalusia terutamanya dalam sektor pertanian. Mereka telah memperkenalkan sistem *latifundia* iaitu sistem yang menindas golongan bawahan dan petani (Reilly, 1993). Disebabkan penindasan ini, ramai golongan ini yang lari meninggalkan tanah-tanah pertanian. Situasi telah memberi kesan terhadap kemajuan ekonomi Andalusia (Maruwiah, 2003). Berkenaan sistem ini, Imamuddin menyatakan:

The first evil of the system was the latifundia and the second the absence of columela that is, large properties cultivated by slaves under the direction of the head of a small town, little interested in the cultivation of the lands.

Sistem ini mampraktikkan jika tanah ladang dijual kepada tuan tanah yang baru, hamba-hamba yang menguasai tanah tersebut akan turut terjual sama. Faktor penindasan inilah yang menjadi sebab utama kejatuhan ekonomi di Andalusia di bawah pemerintahan orang Rom (Dozy, 1913, Imamuddin, 1963 & Azam, 1991). Kedatangan Islam ke Andalusia berjaya memulihkan semula kegiatan ekonomi yang lumpuh semasa zaman pemerintahan Kerajaan Visigoth dan Kerajaan Rom. Situasi ini dapat dilihat daripada kenyataan Leon Ardzrooni (1913):

“Under the wise administration of Mohammedan caliphs agriculture, commerce and industry received fresh impetus.”

Di bawah pemerintahan Kerajaan Umayyiah, Andalusia menjadi sebuah negara yang termaju di Eropah walaupun dari semasa ke semasa banyak berlaku kekacauan politik. Oleh yang demikian, bagi memastikan kekuasaan Islam bertapak kukuh di Andalusia semestinya memerlukan satu sistem perekonomian yang baik yang boleh menjamin keberagaman hidup masyarakat di Andalusia. Kegiatan pertanian juga telah dimajukan semula oleh pemerintah. Pelbagai usaha dijalankan untuk meningkatkan aktiviti pertanian di Andalusia sebagaimana yang dinyakan oleh Chejne (1974) dalam petikan di bawah:

The early Umayyad rulers fully realized the importance of agriculture in the economic life of the country and endeavored to improve irrigation by constructing canals. They also improve agricultural produce by



introducing vegetables, spices, rice, sugar, oranges and cotton from the East. These products were widely cultivated.

Sistem pertanian *latifundia* yang berleluasa pada zaman sebelumnya juga telah dihapuskan (Ardzrooni, 1913). Mereka telah memperkenalkan sistem pengairan tanah pertanian yang baru, pengenalan kepada tanaman-tanaman baru, teknologi penanaman baru yang membuahkan hasil yang lebih banyak, kalendar pertanian dan sebagainya (Reilly, 1993). Sistem pertanian baru yang diperkenalkan ini banyak memberikan manfaat kepada rakyat dan bukan dimonopoli oleh pemerintah semata-mata. Selain bidang pertanian, bidang-bidang ekonomi lain seperti perindustrian dan perlombongan juga turut diberikan perhatian (Reilly, 1993). Selain itu, wilayah di Andalusia yang kurang subur dan gersang terutamanya di bahagian tengah Andalusia telah dijadikan kawasan ternakan kambing biri-biri untuk menghasilkan bahan mentah perindustrian seperti bulu (Ardzrooni, 1913). Bandar-bandar utama di Andalusia telah muncul sebagai pusat-pusat perindustrian seperti industri pertukangan besi dan kayu, tekstil, ceramik, kertas, barangan perhiasan dan sebagainya. Cordova, Malaga dan Almeria terkenal dengan industri sutera dan pakaian bulu (Ardzrooni, 1913). Dalam sektor perlombongan pula, Andalusia telah muncul sebagai pengeluar emas dan perak yang membolehkan para pemerintah Kerajaan Umawiyah mewujudkan mata wang mereka sendiri. Selain itu, dengan pembinaan masjid, istana-istana dan kawasan-kawasan awam yang lain pula telah mewujudkan peluang pekerjaan kepada penduduk-penduduk di Andalusia. (Chejne, 1974). Perkembangan sektor-sektor ekonomi di Andalusia ini akan dibincangkan dalam tajuk yang seterusnya.

Andalusia juga terkenal sebagai sebuah negara yang istimewa dengan tanah-tanahnya yang subur dan kaya dengan pelbagai jenis tumbuhan. Faktor ini menjadikan Andalusia sebagai antara kawasan yang terpenting di dunia dari segi ekonomi. Pada masa tersebut kemakmuran Andalusia ini menyebabkan ia mendapat beberapa jolokan iaitu *Paradise on Earth* bermaksud syurga di atas bumi dan *Heaven's Gate* bermaksud pintu gerbang syurga (Nurul Huda & Rosmariza, ____).

Kekayaan sumber semulajadi di Andalusia ini digambarkan dalam kenyataan Jane S Gerber (1992):
The land is rich, abounding with rivers, springs, and aqueducts; a land of corn, oil and wine, of fruits and all manner of delicacies; it has pleasure-gardens and orchard, fruitful tress of every kind, including the leaves of tress upon which the silkworm feeds...there are also found among us mountain...with veins of Sulphur, porphyry, marble and crystal. Merchants congregate in it and traffickers from the ends of earth.... bringing spices, precious stones, splendid wares for kings and princes and all desirable things of Egypt. Our king has collected very large treasures of silver, gold, precious things, and valuables such as no king has ever collected. His yearly revenue is about 100,000 gold pieces, the greater part of which is derived from the merchants who come hither from various countries and islands.

Antara sektor utama yang menyumbang kepada perkembangan di Andalusia ialah sektor pertanian, sektor perindustrian, sektor perlombongan dan sektor perdagangan. Sektor-sektor ini berkait rapat antara satu sama lain. Sebagai contohnya, perkembangan dalam sektor pertanian dan perlombongan telah memesatkan pertumbuhan sektor perindustrian manakala perkembangan dalam sektor pertanian, perlombongan dan perindustrian pula telah menyumbang kepada kepesatan sektor perdagangan Andalusia. Kepesatan dalam sektor perdagangan ini pula telah menyebabkan kewujudan unit mata wang yang digunakan sebagai bantantara transaksi jual beli dan muamalah masyarakat di Andalusia. Menurut Kasim Awang (2006), pertanian di Andalusia boleh dianggap sebagai pencapaian terbaik orang Islam dalam bidang ini di seluruh wilayah Islam di ketika itu. Pendapat ini disokong oleh Scoot (2006) yang menyatakan:

"The agricultural system of the Spanish Muslim, in particular, was the most complex, the most scientific, the most perfect, ever devised the most scientific, the most perfect ever devised by the ingenuity of man."

Bidang pertanian dianggap sebagai penyumbang utama kepada kegemilangan dan kemewahan masyarakat di Andalusia. Menurut Khayr Allah Tulaffah, bidang perindustrian di Andalusia tidak akan berkembang maju tanpa kemajuan dalam bidang pertanian (Tulaffah, 1977). Di Andalusia, pertanian adalah satu bidang ekonomi umum yang diceburi oleh majoriti rakyat kelas pertengahan. Sektor ini mendapat pengawasan khusus daripada pemerintah terutamanya dalam menyediakan kemudahan-kemudahan dari segi teknologi dan pengairan tanaman. Masyarakat di Andalusia telah berjaya mengubah lanskap Andalusia menjadi kebun yang ditanami dengan tanaman yang beraneka jenis. Secara umumnya, boleh dikatakan semua wilayah di Andalusia telah menikmati kemewahan dari hasil aktiviti pertanian ini. Bidang pertanian telah dilaksanakan secara saintifik yang bergabung dengan kemahiran, ilmu pengetahuan dan perindustrian (Kasim, 2006). Kemajuan bidang pertanian di Andalusia ini juga telah mendapat pengiktirafan yang tinggi dari sarjana-sarjana Islam mahupun Barat. Sebagai contohnya, Philip K. Hitti di dalam bukunya *History of the Arabs* menyifatkan kemajuan pertanian ini sebagai satu kemegahan orang Islam di Andalusia dan di antara sumbangan terakhir orang Arab kepada tanah Andalusia (Hitti, 1970).



Pencapaian cemerlang masyarakat Muslim dalam sektor pertanian di Andalusia didorong oleh pencapaian dan penguasaan teknologi di beberapa bidang yang berkaitan dengan sektor ini. Bidang-bidang tersebut termasuklah sistem pengairan, sistem penanaman dan penyuburan tanah, sistem penyimpanan dan pengawetan hasil pertanian dan pengenalan beberapa spesies tanaman baru di Andalusia. Menurut Watt, teknologi pertanian ini dibangunkan daripada teknik-teknik pertanian yang dibawa dari Timur (Watt, 1965). Mereka juga telah memperbaiki tali-tali air yang telah sedia ada dan saliran-saliran air bawah tanah yang telah dibina sejak zaman pemerintahan Rom lagi (Glick, 2005). Kelancaran aktiviti perindustrian di Andalusia diselia oleh wakil-wakil kerajaan di seluruh wilayah di Andalusia. Penetapan industri-industri ini secara berkelompok telah meningkatkan kepakaran masyarakat di Andalusia dalam pelbagai bidang kemahiran dan menggalakkan persaingan yang sihat dalam kalangan pengusaha-pengusaha industri di Andalusia. Jadual di bawah akan memperincikan penghasilan industri bagi setiap wilayah di Andalusia. Selain sektor pertanian, perlombongan dan perindustrian kemajuan sesuatu tamadun itu turut diukur melalui pencapaian aktiviti komersil iaitu perdagangan. Begitu juga halnya bagi tamadun Islam yang berkembang di bumi Andalusia. Geografi, laluan dan bentuk komunikasi merupakan faktor terpenting yang menjadikan Andalusia sebagai tempat yang istimewa dalam rangkaian perdagangan Eropah dan Timur. Andalusia dan Pulau Sicily yang terletak di bahagian Barat Mediterranean merupakan tempat pertemuan bagi para pedagang Islam dan Kristian bertukar-tukar barangan. Selain itu, beberapa kelebihan lain yang mampu mengekalkan Andalusia sebagai pusat perdagangan strategik khususnya pada abad pertengahan. Pertama, Andalusia sebagai zon wilayah perdagangan dan transit barangan di antara negara Islam dan Kristian. Kedua faktor geografinya yang berpotensi untuk mengambil manfaat atau memanipulasi aktiviti perdagangan manakala yang ketiga pula konsumerisme dan produktiviti ekonomi di Andalusia itu sendiri.

Pada zaman pemerintahan Kerajaan Umawiyah, bandar-bandar di Andalusia telah menjadi pusat ekonomi terpenting bagi pertemuan para pedagang dari seluruh wilayah Mediterranean membawa barang dagangan mereka. Para pemerintah Kerajaan Umawiyah telah menyediakan kemudahan-kemudahan untuk para pedagang tempatan dan luar negara menjalankan kegiatan perdagangan mereka di Andalusia. Sepanjang pemerintahan Kerajaan Umawiyah sehinggalah zaman *Reconquista*, hubungan perdagangan Andalusia dengan wilayah-wilayah Islam lain di Mediterranean terus berlangsung (Constable, 1992). Di samping itu, kekayaan hasil bumi Andalusia menyebabkan negeri ini mampu menghasilkan sendiri barangan keperluan dan barangan mewah yang mendapat permintaan tinggi daripada penduduk tempatan mahupun luar negara. Demikian juga pertambahan jumlah penduduk yang semakin meningkat saban hari telah menyebabkan permintaan yang tinggi terhadap setiap barangan. Kemakmuran dalam kedua-dua bidang ini digambarkan dalam kenyataan Leon Ardzrooni (1913):

This progress in commerce and industry was the basis of the growth of a large and prosperous population under the Mohammedan domination. Cordova which was one of the most populous and wealthy cities in Spain, was unsurpassed by any in the world in pomp and splendor.

Dilaporkan bahawa pada zaman pemerintahan 'Abd al-Rahman al-Nasir, jumlah penduduk di Cordova bertambah hingga ke angka 500 juta orang dan Cordova sendiri telah menjadi sebuah bandar metropolitan yang sangat maju. (Mohd Syukri & Abd Ghafar, 2007 & Chalmata, 1992). Pada masa yang sama juga, dilaporkan sebanyak 200,000 buah rumah, 600 buah masjid, 900 buah rumah mandi awam yang dilengkapi dengan kemudahan saliran air dan taman-taman awam telah dibina di Andalusia. Hal ini bertepatan dengan kenyataan Jihoon Koo (2011) yang menyatakan:

No equal in the Maghrib, or in the Jazira, or Syria, or Egypt, to approximate the size of its population, extent of its territory, area of its markets, cleanliness of its inhabitants, construction of its mosques, and number of its baths and hostels.

Seterusnya, jumlah pendapatan negara juga telah meningkat daripada 800,000-dinar pada zaman pemerintahan 'Abd al-Rahman al-Dakhil kepada 13,000,000 dinar pada zaman pemerintahan 'Abd al-Rahman al-Nasir (Ardzrooni, 1913). Ini menunjukkan bahawa Andalusia telah mencapai satu tahap ekonomi membanggakan yang melambangkan kesungguhan pihak pemerintah dalam memperkasakan ekonomi masyarakat di Andalusia tidak dapat dinafikan. Situasi ini amat berbeza dengan pemerintahan Kristian di Andalusia meliputi wilayah Leon dan Asturias yang kelihatan agak ketinggalan dan mundur dalam aspek ekonomi (Ardzrooni, 1913). Berhubung dengan kegiatan perdagangan di Andalusia, sebenarnya masyarakat di sini telah lama mengamalkan pertukaran barangan antara mereka. Para petani dan penduduk luar bandar akan membawa barangan keluaran mereka seperti hasil pertanian dan barangan industri kampung untuk dijual di bandar-bandar besar dan kemudiannya membeli barang-barang keperluan harian dan barang mewah yang tidak terdapat di tempat mereka (Salmah, 2009). Di samping perdagangan domestik, penduduk Andalusia juga menjalankan perdagangan antarabangsa. Menurut Azam Hamzah, orang Islam di Andalusia telah menjalankan kegiatan perdagangan dengan seluruh negara Eropah, Afrika dan Asia. Perdagangan tersebut berlaku sama ada melalui jalan darat dan jalan laut. Para pedagang Andalusia Islam, Yahudi dan Kristian sibuk menjalankan urusan perniagaan import



dan eksport mereka. Mereka dilaporkan membawa barang dagangan mereka dari satu tempat ke satu tempat yang lain. Kebanyakan daripada biografi pedagang-pedagang ini boleh dijumpai di dalam beberapa karya fiksiyen dan ada juga yang ditulis dalam karya berbentuk biografi (Imamuddin, 1963). Perkembangan sektor perdagangan di Andalusia era pemerintahan Umayyad ini akan dibincangkan secara tuntas dalam bab yang seterusnya.

Kesimpulan

Berdasarkan kepada perbincangan di atas dapat dikemukakan beberapa perkara penting. **Pertama**, kedatangan Islam ke bumi Andalusia khususnya pada era pemerintahan Kerajaan Umayyad telah membawa perubahan yang besar terhadap struktur ekonomi di Andalusia. Aktiviti ekonomi diberi nafas baru dan digiatkan sehingga mampu mengangkat Andalusia sebagai sebuah kerajaan yang gemilang dibawah pemerintahan Islam di bumi Eropah. Struktur ekonomi yang diamalkan sebelum pemerintahan Islam di Andalusia telah dirombak khususnya dalam aspek pertanian yang lebih banyak menguntungkan golongan atasan dan menindas golongan bawahan. Namun tidak dinafikan bahawa perkembangan ekonomi telah berlaku pada zaman sebelumnya tetapi tidak serancak perkembangan yang berlaku pada era pemerintahan Islam di Andalusia. **Kedua**, di bawah pemerintahan Kerajaan Umayyad, pelbagai sektor ekonomi telah dimajukan semula. Perkembangan ini telah menyumbang sebahagian besar pendapatan negara. Ia digunakan untuk perbelanjaan mentadbir negara, membayar gaji-gaji tentera serta membangunkan wilayah Andalusia dalam segenap aspek kehidupan. Perkembangan ekonomi di Andalusia telah mengangkat penduduk Andalusia sebagai sebuah masyarakat urban yang produktif dan hidup dalam kemakmuran.

Rujukan

- Constable, O.R. 1992. Muslim merchants in Andalusi international trade. Dlm. al- Jayyusi, S.K. (pnyt.). *The Legacy of Muslim Spain*, hlm. 759-776. Leiden: E.J Brill.
- Chejne, A.G. 1969. Jughrafiyyat al-Andalus wa-Urubba min Kitab al-Masalik wa al-Mamalik. *Journal of the American Oriental Society* 89(2): 454-456.
- Chejne, A.G. 1974. *Muslim Spain Its Culture and History*. UK: The University of Minnesota Press.
- Arzdroni, L., Commerce and industri in Spain during ancient and mediaeval times, *Journal of Political economy* 21(5): 432-453, Chicago, The University of Chicago Press, 1913, hlm. 434.
- Azam, 1991, hlm. 4-5, Azam Hamzah, Perkembangan Ilmu Pengetahuan di Andalusia pada Zaman Pemerintahan Banu Umayyad. Tesis Sarjana, Universiti Kebangsaan Malaysia, Bangi, 1994, hlm. 43.
- Chalmata, Pedro, An approximate picture of the economy of al-Andalusia, Dlm. al-Jayyusi, S.K. (pnyt.), *The Legacy of Muslim Spain*, hlm. 741-758, Leiden, E.J Brill, 1992, hlm. 755.
- Constable, O.R., *Trade and traders in Muslim Spain: The commercial realignment of the Iberian Peninsula 900-1500*, USA, Cambridge University Press, 1994, hlm. 5
- Dozy, R., *Spanish Islam: A History of the Moslems Spain*, London, Duffield, 1913, hlm. 217-218
- Gabriel, R.R.K., The Golden Age al-Andalusia, Master Thesis, California, University Dominquez Hills, 2008, hlm. 41.
- Glick, T.F., *Islamic and Christian Spain in the Early Middle Ages*, Brill, Leiden, 2005, hlm. 253-260.
- Hitti, P.K. 1970. *History of the Arabs*. Ed. 10. London: The MacMillan Press.
- Ibn Khaldun, *Mukadimah Ibn Khaldun*, Terj. Dewan Bahasa dan Pustaka, Kuala Lumpur, Dewan Bahasa dan Pustaka, 2009, hlm. 470
- Imamuddin, S.M, *The Economic History of Spain under the Umayyads, 711-1031 A.C*, Pakistan, Asiatic Society of Pakistan Dacca, 1963, hlm. 4; Azam Hamzah, *Sejarah dan Tamadun Islam di Andalusia (711M-1492M)*, Kuala Lumpur, Penerbitan Hizbi, 1991, hlm. 2.
- Jane S, Gerber, *The Jews of Spain: A History of the Shepardic Experience*, New York, Free Press, 1992, hlm. 28.
- Karatas, S.C., *The Economic Theory of Ibn Khaldun and the Rise and the Fall of Nations*, United Kingdom, Foundation for Science Technology, 2006, hlm. 10.
- Kasim Awang & Abbas, Eeman Muhammad. 2006. Sumbangan masyarakat Islam dalam tamadun pertanian di Andalus (711M-1492M). Kertas kerja *Prosiding Kolokium Siswazah Fakulti Pengajian Islam Siri II 2006*, hlm. 347-358. Anjuran Fakulti Pengajian Islam, UKM. Bangi, Selangor, 25 Julai 2006.
- Labib, S. Y., Capitalism in Medieval Islam, *The Journal of Economic History* 29(1): 79-96, Cambridge University Press, Economic History Association, 1969, hlm. 81.
- Mohd. Syukri Yeoh Abdullah & Abdul Ghafar Don, Penyebaran Islam di Andalusia menurut perspektif dakwah, Kertas kerja *Prosiding Simposium Tamadun Islam Abad Pertengahan II Politik, Ekonomi, Sosial dan Intelektual Era Andalusiai*, hlm. 121-128, Anjuran Jabatan Pengajian Arab dan Tamadun Islam, FPI, UKM, 17 Mac 2007, hlm. 127.



-
- Nurul Huda Ab Ghani & Rosmariza Mohd. Noor. Kitab tarikh iftitah al-Andalus karya Ibn al-Qutiyyah: Satu ulasan. *Pendidikan Sejarah Islam di al-Andalus Berteraskan Teks Muktabar*, hlm. 43-60. Ajuran Jabatan Pengajian Arab dan Tamadun Islam, FPI, UKM. Bangi, Selangor, 24 April 2010.
- Reilly, B.F., *The Medieval Spain*, Cambridge University Press, New York, 1993, hlm. 62-63; Chejne, 1974
- Sabri, Sahibzada Masud-ul-Hassan Khan, *History of Muslim Spain*, New Delhi, Adam Publishers & Distributors, 2004, hlm. 560.
- Sahrulazmi Sidek, Sejarah Perluasan Kuasa Islam di Kepulauan Mediterranean Pada Zaman Pemerintahan Kerajaan Umawiyah (41H/661M hingga 132H/750M), Disertasi Sarjana, FPI UKM, Bangi, 2010, hlm. 32-33.
- Salmah Omar, *Andalusia Semarak Tamadun di Eropah*, Shah Alam, Karisma Publications Sdn. Bhd., 2009, hlm. 70.
- Scoot, 2006, MuslimHeritage.com, 2006, Muslim contribution to Spanish Agriculture, www.muslimheritage.com [3 Mac 2011].
- Tulaffah, Khayr Allah, *Hadharat al-'Arab fi al-Andalusia*, Juzu' 6, Baghdad, Dar al-Hurriyyat li al-Tiba'ah, 1977, hlm. 119.
- Watt, W.M. & Cachia, P. 1965. *A History of Islamic Spain*. Edinburgh: Edinburgh University Press.